

# Mud Volapüka

Nüm 69

11 gustul 2017

---

## Bukemaboed

Fövot lekoned-mära yutopik  
„Ventürs hiela ‚Nenolikan‘ e flenas omik“  
fa hiel „N. N. Nosov“

Kapit degzülid. Lotedam pö hiel ‚Sagatan‘.

Sagatan ästanom lä fenät pimaifüköl vobacema okik e, flekölo bradis krodio love blöt, älogetom fagio letikölo. Hers omik piköbons smudiko pödio, logabobs densitik bläga=herik, yumädöls ko ods sus nud, äkrugikons froniko, das äkodos logodanotodi letikik. Igo no emufilom, kü flens kil obsik epuboms pö cem. Luibül laodiko eglidom etani, ejonodom etane Skrubüli e Lebuonüli ed esagom, das utans ekömoms ad soldafer. Ab Sagatan äbleibom logetön da fenät ko logodanotod so leküpälik, äsif ästeifom ad reifön tiketi seimik tu käfedik e sapik, kel ämufedon pö kap omik e leno pä=da=fanon. Luibül etovülom jotis kofudiko ed elülogedom ko smilil lü Skrubül e Lebuonül, äsva vilölo ad sagön: ‚Ekö!, ga isagob ores atosi!‘“

Fino Sagatan äsva egalikom, eflekom oki lü nü=köm=öl=ans e, tenükölo dinitiko vodis, esagom me vög sofik plitik:

„Gli-i-dö!, gli-i-dö-ö! Begob säkusadi, o flens obik. Äsvo, äfabinob lanöfo, epolölo obi tikälo ini räyuns votik... Sagatan.“ - enunädöm oki ed etenükom nami lü Skrubül.

Skrubül ekoboyumom nami okik ko nam molik äsvo kötötil etana, e koo enunädöm oki.



„Sagatan“ - Sagatan edönu=sagom me vög sofik ed etenükom nami lü Lebuonül me jäst veitik nespidik.

„Lebuonül“ - Lebuonül egesagom e koo enamiflapom kötotili.

„Sagatan“ - Sagatan esagom kil=naedo ed etenükom nami lü Luibül.

„Ab ga ya äkosikogs ko od!“ - Luibül egesagom.

„Vö! ga atan binon Luibülu!“ - Sagatan evokädöm, ejonülölo logodajästi stunik. - „Gli-dö-ö!, gli-i-dö-ö! Begö! seidorsös oris, o flens.“

Valikans eseidoms okis.

„So, ya äkosikors-li ko Boadaskrubül at?“ - Sagatan esäkom, blöfölo me säm okik, das do ga äfabinom tikälo, ipolölo oki lü räyuns votik, ab too ilelilom utosi, dö kelos Luibül äsagom. - „Bo, äjonedom-li völaseadöpis e völatabis omik ores? Ha-ha-ha!“

Skrubül enutom siiko me kap. Logodanotod smililik edavedon pö logod Sagatana. Äsva senälölo plidi, äröbülom kienis me nams ed esagom:

„Ha-ha! Datuvans at valik binons bisaranus. Sagorsös obe, plidö: lü kis völatabs, ramars maifiköl e hamaks doniköl valiks ats zesüdons? Samo, binos plitikumo kol ob ad seadön su stul komunik kovenik, kel no bunülön dis ob, töbo elöädob, u slipön su bed, kel no sleafon dis ob löpio e donio. Lü kis atos, plidö, sagorsös? Kin kanon koedön slipön obi su bed somik? Ab if no vilob?!“

„Ab ga nek müton ori“ - Luibül esagom. - „Boadaskrubül binom datuvanu e steifülom ad gudükumön valikosi, kelosi gebom. Atos lunomiko no fädön beno, ab ijafädöm datuvotis frutik mödik. Binom mastanu gudik.“

„Ab ga no stetob, das binom badiku.“ - Sagatan eta=sagom. - „Dasevob, das binom skilanu vemo gudik! Imekom lu=resit=öm süperik pro ob.“

„Yegu kinik luresitöm at binon?“ - Skrubül esäkom.

„Saga=cin. Ekö, logedorsös.“

Sagatan edugom visitanis lü tab, su kel parat stadon.

„Bog=il u bok=il at: nemorsös oni vio vilors< labon hogi smalik pö flan. Saidos ad sagön vödis ömik lä hog at e poso pedön gnobi, e luresitöm

usösagon [udönu>sagon] vödis orsik ko kurat kälöfikün. Ekö, bluförös oni.“ - Sagatan emobom Skrubüle.

Skrubül eblegükom oki lü hog stuma ed esagom:

„Skrubül, Skrubül. Lebuonül, Lebuonül.“

„E Luibül.“ - Luibül eläükom, eblegükölo oki lü parat.

Sagatan epedom gnobi, e luresitöm, esüpädölo valikanis, äsäyon bruvölo [äsijidon da nud]:

„Skrubül, Skrubül. Lebuonül, Lebuonül. E Luibül.“

„Ab lü kis labor sagacini at üfo?“ - Lebuonül esäkom.

„Ab kikodo nö!?“ - Sagatan evokädom. - „Lautan nen stum at binon go nenfrutiku. Kanob pladön luresitömi pö dom alik ed osumodon valikosi, keli osagoys. Omutob te depenön utosi, ed ekö: konot u lekoned binon bükablümiku.“

„Kio atos binon fasiliku!“ - Lebuonül evokädom. - „Ab idereidom seimöpo, das lautan neodon disini, magälöfi seimik...“

„Zö!, disin!“ - Sagatan evüspikom nesufäliko etani. - „Te pö buks pa<sup>z</sup> penos somiko, das disin zesüdon, ab lio [mögos ad] desinön bosi, ven valikos ya pi<sup>z</sup>datikon bü oy! If steifüloyöv alseimi: atos ya pi<sup>z</sup>disinon. Ab pö mod at: lesumoyös [depenoyös] stedöfo de jenöf, bos ga usekon-la, kelos nog no ädavedon pö lautan alseimik.“

„Ab utan no alik ga uyilidon, dat uplador luresitömi ini cem onik“ - Skrubül esagom.

„Dunob atosi käfiko.“ - Sagatan egesagom. - „Visitob eki ko luresitöm, kel logoton äs trök vio edaküpors. Degolölo, blibükob trökili at dis tab u stul e poso blesiro lelilob utosi, dö kel domasiörs spikons nen ob.“

„Dö kis utans spikons üfo? Atos binon vemo nitediku.“ - Lebuonül esagom.



„Tuvemo nitediko.“ - Sagatan esiom. - „Igo it no spetob atosi. Fädos, das utans sagoni nosi, ab te smilons nen kod seimik, kravons, vaulons, grunons, miovons.“

„Kio stunabiko!“ - Skrubül evokädöm.

„Fe stunabiko!“ - Sagatan esiom. - „Du bliboy pö dom etanas, valikans spikotons gudiko e visedikö, ab üf töbo edegoloy - täno nesiäm voik jenikon. Ekö, leilorsös sumodoti ädelik. Äblibob pö sevädans semik ed iblibükob luresitömi dis tab büä üdegolob.“

Sagatan ätulüköm sirkoti [diskodi] anik, komöl dis tegot tröka, ed epedom gnobi. Sijid ätonon, poso flapa-ton etonon äsya yan pe-färmükon. Stil äkomon ünü minut ze bal, poso süpo smil balälik [balvögedik] pätanon. Ek esagom: „Dis tab“. Jäfäd seimik pä-lilon. Dönu smil ätonon. Ek äkravon, ek ämiovon, ek ävaulon. Poso ek ämäyon. Ek esagon: „Leadolsös skriyön obi äs cuk“. Ed eprimon ad leyälön: ‚I-o! I-o...‘ Poso: „Denu äs jevodül: ‚I-go-go-go!‘“. Smil ätonon dönu.

„Ekö, logors-li... verätikumo lilors-li?“ - Sagatan eätenüköm namis äl flans.

„Si, no mögos ad dütülön mödikosi ad lekoned.“ - Skrubül esagom visedäliko.

„Ukonob kläni ores.“ - Luibül esagom Sagatani. - „Ya valikans sevons dö luresitöm at orik pö zif e, töbo degolor, desino primons ad lerorön me nesiäm valasotik lü cin at.“

„Lü kis nedos ad lerorön me nesiäm üfo?“

„Ävilor belugön etanis ab utans icütöns ori. Ävilor dalilön kisi utans sagoni nen or, ab etans itüvülöns atosi e desino leyälöns e grunons ad besmilön ori.“

Sagatan efronüköm flomi [älogotom saäbäliko]:



‚I-o! I-o!... I-go-go-go!‘

„Vo-li? Täno olükädob etanis. Opladob luresitömi disi fenäts. Cin at nog ugidükon oki. Ekö, stunikorsös: kisu atos binon ma ced orsik?“

Sagatan edajonom visitanes stukoti nesevädik grobik, äsümöl ad u va tänad pe=ne=regulöl [pe=kobo=pliföl] u va jelöm gretik.

„Ba, reina=jelöm?“ - Lebuonül esagom niludi.

„Nö, no jelöm, ab penamatab polovik pa=sä=pliföl ko stul.“ - Sagatan egesagom. - „Samo, büocedorsös, das neodoy bepenoti fota. Täno tävoy ini fot, säplifoy tabi at, seidoy oki koveniko e bepenoy valikosi, kelosi logoy züo. Ekö, bluforös ad seidön ori.“ - emobom Lebuonüle.

Sagatan epedom gnobi pö gleipäd jelöma pa=niludöl, e sunädo jelöm emai=tenidikon, ecenölo ad tab smalik ko stulil. Lebuonül eseidom oki leni tab, demü kelos ämutom tu nekoventiko blegükön lögis okik.

„Senor koveni,“ - Sagatan äsagom vütimo [ottimo] - „e sunädo senälör spiritäli. Dasevorös, das atos binon leplu plitiku kas lautön seadölo su yeb u glun.“

Lebuonül äsenom ni koveni ni spiritäli, abgüä äsenom, das lögs omik primons ad tuvemo dadolön. Kludo esludom ad spidiküno votükön spikota=dini ad votik e, se=dranölo de tab, esäkom:

„Plidö, gesagorsös: buki kinik ilautor?“

„Ifi=lautor buki nog nonik.“ - Sagatan ekoefom. - „Binos vemo fikuliku ad binon lautanu. Lebüä vedön lautanu, vio daküpors, änedob dagetön bosu, ab atos no binon so fasiliku.

Büiküno änedob stebedön sovüo jüs tab polovik pi=mekon. Atos ädadulon dü yels mödik. Pas täno stebedön jüä fi=mekoy luresitömi. Bo, sevor vio mastans desirilons ad zögön. Lepato Boadaskrubül sikom oki pö atos. Fomälorsös,



das etan dü yels tel e laf te ävätälom: lio mekön parati at. Ga go lindifos kol om: kanob-li u no kanob-li stebedön. No dasuemom, das labob vobi jafälik! Fe luresitöm binon paratu komplitik, ab lü kis nedos ad komplitükön yegi pläo komplitik?“

„Ab äkomplitükom-li oni üfo?“ - Skrubül esäkom keliediko.

„Lesi äkomplitükom! Iprimom davobön luresitömi noe komunik ab peyümätöl ko püfisugian. Lü kis neodob püfisugiani? Yels bal e laf zuik pi fegebons demü atos. Ab lindifos!“ - Sagatan esagom. - „Nu labob atosi valik, pülikos defon.“

„Ubinos-la gudiku ad datikön cini, kel okanoböv tikön pla lautan.“ - Lebuonül esagom.

„Gidetor,, - Sagatan ebaicedom.

Eküpölo da fenät, das sol donionepubon, flens obsik eprimons ad leditön. Elesumölo soldaferi, eplödikons sui süt.

Skrubül esagom:

„Nedobs ge-tevön. Dredob, das no uplöpobs bevegön gevegi bü neit.“

„No dredälols, o kompenans, ufi-vaibob olis me tood go suno. Ab büiküno ufidobsös.“ - Luibül esagom ed edeveigom Skrubüli e Lebuonüli lü dom okik ad fidedön.

*Reidolsös fövoti konota pö nüm fovik.*